



Ogni an Pepi cuant che e rivave la Vierte si meteve a cjalâ cul nâs par aiar par viodi rivâ lis cisilis: come cuant che al jere frut i metevin ligrie e gjonde al cûr. Cun lôr a rivavin lis bielis zornadis e il clip che al scjaldave i vuès dopo il frêt dal lunc Unvier.

Pepi, cuntune maluserie dulinziose, al fastiliave viodint che ancjemò no rivavin.

“Dulà sarano ladis?” Al veve sintût dî che ogni an ‘nt rivavin simpri di mancual par tantis cauis. Al sarà stât colpe dal incuinament dal aiar o dai disinfestants che a fasevin murî insets, moscjis, larvis, che a jerin il lôr prin nutriment. Une altre cause e sarà stade l’aument de temperature globâl tant che no rivavin adore a finî il viaç di migrazion e a murivin vie pe strade.

Ma Pepi i dave parplui la colpe a la cementificazion esagjerade in at za di timp no dome tes citâts, ma ancje te campagne.

La cementificazion che e veve puartât vie tant vert ator e e continuave a lâ indenant cence polse, intune maniere che lui al definive “ salvadie”.

Par chest cuant che te famee i vevin fat chê propueste di butâ jù la cjase vecje par fâ sù une gnove par ingrandî e rigjavâ un pâr di apartments ancje pai nevôts, lui si veve cjatât cuintri di ducj.

Parcè che chel progjet al puartave vie tant teren, dut il prât ator fin te braide, lui nol varès volût tocjâ nuie almancul fin cuant che al jere ancjemò vîf. In chê cjase al jere nassût so pari, lui e ancje i siei fis e cumò si voleve disdrumâ dut. Chest pinsîr no i deve pàs, ma dopo tant scombati al veve scugnût propit cedi ma a une condizion, chê di no butâ jù la stale,

parcè che al jere convint che lis cisilis no rivassin plui in tantis come une volte, par vie che planc a planc a jerin sparidis lis stalis, dulà che lôr, sot lis tràfs di len, a cjatavin bon stâ par fâ il nît. Si visave cuant che a rivavin, a zornavin e a sgurlavin ator ator e i fasevin tante companie.

In chê stale al veve ancje un ricuart speciâl, di cuant che al jere za zovinut e cu la sô Milie al lave a platâsi par stâ di bessôi. Propit là i veve dât la prime bussade, ancjemò si visave di chei voi come stelis che lu cjalavin cun chê bocje di ridi e chês strecis come sede cui floccs ros, la cotule plissetade e la bluse blancje ricamade. Lui le cjalave cun atrat provant par jê une grande emozion e al sintive dentri un bon stâ cence confront.

E jere la prime volte che al veve provât par jê chê sensazion, di alore indenant no si varessin plui lassâts.

Dome il nevôt Stieffin al veve cjapât la reson dal nono e al veve ancjemò denant dai voi chê sene e no le dismenteave. Cuant che e jere rivade la ruspe par butâ jù la cjase, al veve viodût so nono blanc come il mûr che al jere lât in font de braide a platâsi daûr dal morâr, al veve cjâlât la sô muse, chê di un disperât. La stale si doveve lassâ par rispiet dal nono, par ducj i sacrificis che al veve fat e si varès dovût ancje regolâle come che lui al voleve.

Al jere simpri timp par butâle jù, ma no cumò.

Al pensave che lis cisilis te stale i varessin dât confuart e companie, li cun lôr il nono forsit al varès sintût la vite mancul grivie e al varès acetât cun plui serenitât ducj i mudaments. Parcè che Pepi al varès spietât simpri lis cisilis che a tornavin te stale, come cuant che al jere frut, e li di bessôi, lontan dal mont confusionari e trist, al varès sintût in mò plui fuart la pâs di chel lûc che i parave vie chel marum e i puartave il seren tal cûr.

di Egle Taverna